

Die Kuh steht trucke

Was tät die Oma do derzu nor saan?
Dass se Milch nit ausm Gschäft muss traan?
Sicher hätt se in der heitich Zeit nor gschennt
weil die Automate, die sin jetzt im Trend.

Mer geht, mit oder ohne Flasch, stoppt nin sei Geld
un drickt de Knopp – beim Melke jeder is e Held.
Un am e Tach, do steh ich an dem Ding un drick,
doch nix rieht sich an dem modisch Gfick.

Studier e Weil un wees mer nit zu helfe, wart
dass der Automat sich endlich spurt zum Start.
Umesunscht! Es laaft un laaft ke weisses Nass,
noh zehn Minute wees ich, 's is ke Gspass!

Ich iwerlee e Weil un endlich sin ich druf a kumm:
Es is doch Winter, Mensch, wie sin ich dumm!
Es Viech doch in dere Zeit im Stall muss hucke
un die Kieh, ja die stehn jetzer sicher trucke!

Iwer Scholle un Staab

E jede Sunntach is er kumm ufs Baal
ausm Nachberschdorf. Es war e Qual.
Iwer Scholle is er gang, es war vill Staab
uf seine alde Schuh, vun lauter Trab.

Sei Name war de Mädle nit bekannt,
ganz abgewetzt sei Sunntachsgwand.
Beim Tanze hat der Bu nor schiewe kenne,
die Omas tun ganz wild stalliere, schenne.

Vor dem Tänzer han die Mädle sich gschenniert,
doch des alles hat der nit bemerkt, kapiert.
Ke Tanz hat er de ganze Owet ausgelosst, oh nee!
Er hat sogar oft Hodwod gschrie, war nie verlee!

For die Buwe war er a e Dorn im Au, for was?
Weil er an villi Mädle gsucht sei Gspass.
Gelung is des em nie, sie han ne abgewimmelt,
umsunscht hat er die Mädle angehimmelt.